

96-боб. Қулларни сўкиш



16:22 / 14.09.2020 3257

Маърур ибн Сувайддан ривоят қилинади:

«Абу Зарр Ғифорийни кўрдим, ўзи ҳам, қули ҳам бир хил либос кийиб олишибди.

Абу Заррдан бу ҳақда сўрадик. У шундай деди:

«Мен бир одам билан сўкишиб қолдим. У одам Набий соллаллоҳу алайҳи васалламга менинг устимдан шикоят қилди. Шунда Набий соллаллоҳу алайҳи васаллам менга:

«Сен уни онаси билан айбладингми?» дедилар.

«Ҳа», дедим. Шунда у зот:

«Албатта, қулларингиз биродарларингиздир. Аллоҳ уларни қўл остингизда қилиб қўйган. Кимнинг биродари қўл остида бўлса, унга еганидан едирсин, кийганидан кийдирсин. Уларга кучи етмайдиган нарсани юкламанг, бордию юкласангиз, уларга ўзингиз ёрдам беринг», дедилар».

Шарҳ: Расулуллоҳ соллаллоҳу алайҳи васаллам қулларни «биродарларингиз» деб эълон қилдилар ва шунга яраша муносабатда бўлишга чақирдилар. Ҳатто оғир ишга буюрмасликни, агар буюрилса, унга ёрдамлашиб юборишни таъкидладилар.

Абу Зарр Ғифорий розияллоҳу анҳу бир қулларини сўкканлари учун Расулуллоҳ соллаллоҳу алайҳи васаллам Ислом умматига ана шундай буюк ва шарафли насиҳатлар қилдилар.

Ушбу ҳадисдан олинадиган фойдалар:

1. Абу Зарр Ғифорий розияллоҳу анҳунинг Расулуллоҳ соллаллоҳу алайҳи васалламнинг ҳадисларига оғишмай амал қиладиган зот эканлари.
2. Бировнинг қилаётган ишини тушуна олмаса, ўзидан сўраш жоизлиги.
3. Биров билан сўкишиш жоиз эмаслиги.
4. Раҳбарга ўзи билан сўкишган киши ҳақида арз қилиш мумкинлиги.
5. Ходимлар хўжайинларнинг биродарлари экани.
6. Хўжайин ўзи еган нарсадан ходимига ҳам едириши кераклиги.
7. Хўжайин ўзи кийган нарсадан ходимига ҳам кийдириши кераклиги.
8. Хўжайин ходимига оғир келадиган ишни буюрмаслиги кераклиги.
9. Хўжайин ходимига оғир иш буюрса, унга ўзи ёрдам бериши кераклиги.

«Одоблар хазинаси» китобидан